

兵，別擊車師。諸國兵圍車師，車師王降服，臣屬漢。」

此雖不言焉耆，但焉耆與危須、尉犁均爲近隣，必參與是役無疑。故鄯善之「擊車師都尉」及「擊車師君」，疑設於武帝征和四年或天漢二年擊車師之時也。時樓蘭尙未南遷，改國號，故傳記中仍用樓蘭國名號。以後雖不擊車師，而官名仍存，故班固著錄之也。至龜茲之「擊車師都尉」，疑設於宣帝以後。車師傳中稱：地節二年，吉、熹發城郭諸國兵萬餘人，自與所將田士千五百人共擊車師，攻交河城，破之。時龜茲已屬漢，必參與是役。則龜茲「擊車師都尉」之設，當在宣帝以後也。至於「却胡侯」亦疑設於漢宣帝元康間，與焉耆之「卻胡侯」及龜茲、危須、焉耆、車師後王之「擊胡侯」同置，皆因爭車師與擊匈奴而設也。由是言之。西域諸國之兵士受漢朝之調遣。統兵之軍官受漢朝之命令與官號。則西域諸國之軍權，完全集中於漢人之手矣；不特鄯善一國爲然也。故自漢武帝伐大宛之役以後，歷昭、宣、元、成，從未派遣大軍至西域，而西域各國均降服於漢者，皆用西域之兵以制西域，所謂以夷狄攻夷狄之善計者也。其次則爲漢派遣之漢官。在武帝時，僅置一「使者校尉」領護田卒。及宣帝神爵三年，因匈奴日逐王降漢，設置都護。據西域傳所述：「都護督察烏孫、康居諸外國動靜，有變以聞，可安輯，安輯之；可擊，擊之。」是都護職權專制一方，爲西域諸國之軍政最高首領。西域傳又稱「屯田校尉」始屬都護，是又兼攝屯墾事務。是不啻西域之軍、政、財三大權，均集中於都護之手矣。據漢書百官公卿表序云：

「西域都護副校尉秩比二千石，丞一人，司馬、候、千人、各二人。」

據百官表：戊己校尉之丞、司馬、候秩比六百石，則都護之丞、司馬、候、千人秩祿當與相同。是都護之秩祿等於漢之郡太守。故西域都護治烏壘，立幕府。鄭吉傳云：「吉於是中西域而立幕府」可證。漢制唯大將軍有幕府；今鄭吉於烏壘立幕府，是權侔大將軍矣。故能徵發兵馬，征討不服。而西域將、相、王、侯，亦統受其節制也。至元帝時，復置戊己校尉，屯田車師前王庭。以余之考證，戊己校尉直屬中央，（參考下文漢簡考釋。）